



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 7



Kim Jong Un-i military tashi
ajungkettsü ayongzük



PM-i India nunger masü saka yimten
tongtibangba kümdaktsü: Priyanka

VOL. XVIII NO. 239 (ADOK 239) DIMAPUR

AMUNGNÜ (SUNDAY)

AAMI (JUNE) 13, 2021

₹ 5.00

COVID-19 Nagaland: Anogo tenetbuba taneptsü angur timba

Kohima, June 12, 2021 (TYO): Nagaland nung tanü agi anogo tenetbuba COVID-19 puteter dang nungibo taneptsü angur timba liasü.

Honibarnü nisung 235 taneptsü angu aser 96 dak putet. Tanü puteter züingsema nisung ajak agi 23,562 kümogo.

"Tanü nisung 96 dak COVID-19 putet. Parnokji Kohima nung 38, Dimapur nung 26, Mokochung nung 20, Tuensang o Zunheboto nung pezüzü (4) aser Mon o Phek nung anana (2) lir" ta Integrated Disease Surveillance Project atema State Nodal Officer, Dr Nyanthung Kikon-i metetdaktsü.

Maneni, tanü nisung 235 tashi taneptsü angu. Parnokji Dimapur nung 126, Mokochung nung 35, Tuensang o Kohima nung metsür trokrok (2), Wokha nung 9, Zunheboto nung 8, Longleng o Phek nung anana (2) aser Peren nung 1 lir. Parnok züingsema taneptsü angur nisung 18,822 kümogo" ta pai ashi.

Tanü taneptsü angurtem züingsema Nagaland nung COVID-19 nungi taneptsü angur 79.88% kümogo.

Tang nisung 3,633 anepaludar

aser positive rate 15.41% aluogo, ta Dr Kikon-i ashi.

Honibarnü Dimapur nung COVID-19 puteta lir nisung 3 asüba züingsema tasür ajak agi 448 kümogo, ajisüaka nisung 14 bo tanga tashidak ajanga asü. Nagaland nung COVID-19 puteter nisung 659 tashi tanga state temi ogo.

Nagaland nung COVID-19 alitsü akok ta temolung melemi bilemba sample 2,06,708 tendangogo. RT-PCR ajanga 93,551, TrueNat ajanga 58,307 aser Rapid Antigen Test ajanga 54,850 tendang, ta Dr Kikon-isa metetdaktsü.

Hokolbar tashi nung Nagaland nung nisung 2,80,865 nem COVID-19 vaccine indang dose 3,35,555 agütsüogo.

Vaccine agirtemji frontline workers 59,327, healthcare workers 15,697, arishi küm 45 ser tempur 1,28,866 aser arishi küm 18 nungi 44 tsüingda lir 76,975 lir.

"Vaccine agir rongnungisa nisung 54,690-i dose anaprong agiogo. Parnokji frontline workers 28,123, healthcare workers 10,301 aser arishi küm 45 ser tempur 16,266 lir" ta Dr Thurr-isa ashi.

Covid wara tanabuba nung doctor 719 süogo IMA-i Jun 18 nü 'National Protest Day' amongtsü

New Delhi, June 12, 2021 (Agencies): India nung Covid-19 wara tanabuba mapang doctor 719 taküm samaogo ta Honibarnü Indian Medical Association (IMA)-i metetdaktsü.

Bihar nung doctor 111 taküm sama aser iba state sülen Delhi nung doctor 109 süogo. Parnok ajak ya Covid19 dak sendakba timtem ajanga asüba liasü.

Northeast nunga Assam nung doctor 8 aser Manipur nung 5 süogo, ta IMA-isa metetdaktsü.

Covid19 wara tanabuba nung Tripura nunga doctor 2 asü.

Maneni, IMA-i June 18, 2021 nü 'National Protest Day' ta ser amongtsü telemetba agiogo.

India kübok tesem balala nung doctor tem amakba anema parnokki lungkak aita iba anogo amongtsü.

"Centre aser state sorkartemi healthcare mapa inyakerem kümzüka ayutsü atema mapa inyaktsüla. Assam, Bihar, West Bengal, Delhi, Uttar Pradesh, Karnataka aser tangalen doctor tem dak teka sangshiba atema aoksar aser iba ya kanga majung.

Tatalokba balala nung doctor tem kanga mejungi yiruogo" ta IMA president JA Jayalal-i ashi.

"Talisa, tetsür doctor tem dang o tamajung kanga ashir aser teka sangshir. Anogoshia linük kübok tesem balala nung doctor tem dak teka sangshir" ta Jayalal-isa ashi.

Prime Minister Narendra Modi, Union health aser state balala nung home minister aser chief minister temi healthcare mapa inyakerem kümzüka ayutsü atema tangsa mapa inyaktsüla, ta paisa metetdaktsüogo.

India nung Central hospital and Health Care Professionals Protection Act den IPC aser Code of Criminal Procedure (CrPC) mapa küma inyaktsü akhanger, ta IMA-isa ashi.

Mozü ki shia nung security tajungba akümtsüla aser akangshitsüla aser kasa mapang mozü kitem ya 'protected zones' ta sangdongtsüla. Medical mapa inyakerem dak teka sangshirtem fast-track inyakyim nung ken o benoka angadangtsüla aser ozüing tesashi agi merenshitsu, ta IMA-isa metetdaktsüogo.

Minister Pangnyu-i district ketdangsürtem den Covid osang metetpela



S. Pangnyu Phom-i District ajak nungi CMO aser MS den video conference ajanga COVID-19 wara den vaccine agütsüba osang metetpela nung angur.

Kohima, June 12, 2021 (TYO): Honibarnü Health & Family Welfare Minister, S. Pangnyu Phom-i District ajak nungi CMO aser MS den video conference ajanga COVID-19 wara den vaccine agütsüba osang metetpelaogo.

NIC Secretariat nung

amenba senden nung Principal Secretary, Amardeep Singh Bhatia (IAS), Secretary Wezope Kenye (IAS), Principal Director Dr. Neikhrielie Khimiao, Joint Secretary Ajit K.Ranjan (IAS), Director (FW) Dr. Thorhusie Katiry, Director (Dental) Dr. Theyiephrezo Khimiao, Joint

Director Dr. Kika Longkumer, Joint Director Dr. Neisakho Kire aser Deputy Director Dr. Nyan Kikon nungertem aden.

Iba senden nung Minister Pangnyu-i medical worker ajak nem tenüngsang agütsü aser maneni memchir tenzüksü ayongzük.

Senden nung medical ketdangsür aser staff tem pei pei mapa lemzüksüdak aliba onük benoka lemsatep. Parnokisa COVID tendangba, vaccine agütsüba, district shia nung oxygen concentrator, oxygen cylinders aser ventilators aliba osangtem metetpela.

Senden nungsa NHP (World bank) kübok mapatong balala inyakba aser NGOs, company, Arogotem, temeimertemi tenla agütsüba aser PPE/Mask/Vaccine/Medicine aser oset ano nüngdakba onüktem benoka lemsatep.

NHRC-i Nagaland Chief Secretary dang meimchir temeten agütsütsü tuyur

New Delhi, June 12, 2021 (Agencies): National Human Rights Commission (NHRC)-i Nagaland Chief Secretary dang state nung yim 100 tema nem meimchir temeten agütsütsü tetuyuba agütsüogo.

Supreme Court lawyer aser human rights activist Radhakanta Tripathy-i ken o balala benokba nung ajemdaker NHRC-i iba tetuyuba agütsü.

Nagaland kübok yimtsüing aika nung gari lenmang tajung, tzü tajemtsü, primary health care aser education facility mali aser yimdaklirtemi khuret aika ajurur, ta Tripathy-i ashi.

Külen, Centre aser State sorkartemi tenzüksüba social schemes shitak meinyaker, ta paisa ashi.

Nagaland nung Refugee tem nem temeten shitak agütsür aser Private Tax mali aser state nung terenlok lir ta Chief Secretary aser DGP nati NHRC dang ashi.

Ajisüaka, Tripathy-i iba atema o meyiptsüdag 'yimdaklirtem nem temeten magütsür' ta ashi.

NHRC-i Nagaland Home Commissioner-i ashiba onük agizük aser Tripathy-i o meyiptsüba atema telangzüba agütsütsü tetuyuba agütsü.

Nagaland nung refugee tem nem meimchir temeten magütsür ta Tripathy-i ashiba atema

Nagaland Home Commissioner-i Nagaland ajungalen Bengal Eastern Regulation (BEFR) Act, 1873 benoka lir ta ashi.

"Tanga state nungi aruba nisung kati Inner Line Permit (ILP) bener arutsüla aser nisung indang maitsü aser tanga kulitem jangjaba sülen ang ILP agütsü. Iba nisung dak tim masüba mapa inyakba ken o benokra, ozüing nung aliba ama mapa inyaker. Nagaland nung Tibetan refugee tem dak alaka tanga refugee mali" ta Nagaland Home Commissioner-i ashi.

Ajisüaka, Tripathy-i ashiba agi, "Nagaland nung refugee temji Tibetan refugee aser Bangladeshi nunger lir. Assam aser Tripura nung ama masü Nagaland nungbo tangalen nungi arur balaka zülüoka mayur aser iba ya lisopur maitsü atema lendong loir. Sumiya inyakyim toktsür Nagaland nung ozüing alema arur nisung lakh 1 tema lir."

Tripathy-isa ozüingi memelaba tax saruba indang onük benokba atema Home Commissioner-i ashiba agi "telungpur telok kari private tax agir saka telok ka dak alaka tanga teloktemi agiba anenogo."

Nagaland nung alirtemi sorkar nem tax agütsüba dak alia telungpur telok pungu- National

Socialist Council of Nagalim (Isak-Muivah), GPRN / NSCN (Khole-Konyak), NSCN (Khaplang) aser Naga National Council (NNC) telok ana nem tax agütsür ta Tripathy-i tai tongloksü.

Telungpur teloktemi ozüingi memelaba tax aika agiba aser amokmerenba den state sorkari teinyaktsü meinyakbaji meimchir nem temeten magütsüba lir, ta paisa ashi.

Nagaland nung aliba telungpur teloktemi India sorkar den ceasefire tenangzüktep agia lir aser sepaitem den khatpeba anenogo. Ajisüaka, NSCN (K)-i March 2015 nung ceasefire tenangzüktep raksa aser security forces-i parnok anema mapa inyakdar, ta Nagaland Home Commissioner-isa NHRC dang ashi.

Nagaland nung ozüing alema tax tanen makai sarur aser ano Highways o check-gates nung khu abenba garitem dang nungi tashiyim agi sen meshir ta Tripathy-isa NHRC tsüingdag onük benok.

NHRC-i tetuyuba agütsüba sülen Nagaland Chief Secretary aser DGP nati state nung telungpurtemi ozüing alema mapa inyakba azüoktsü atema mapa inyakdar ta osang metetdaktsüogo.

Covid putetaka meshirangertem pei kidang takdang balaka nung mongdaktsür, idangji -

Pei alidak aser ayipdak mopong aitsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.

Pei meyong mobile phone, kumesü aser toothbrush nunger ama melentepa tamshi.

Mozü achitsü agüja lira, aji shitak chiang.

Tango junga mesashitetba, teku ashiba, aketba aser temang metaba timtem lira yakta doctor bushiang.



Tir Yimiyim



Kiphire nung Pneumococcal Conjugate Vaccine (PCV) amenokogo



District Hospital, Kiphire nung Pneumococcal Conjugate Vaccine (PCV) amenokdang tangokba noksa nung angur.

Dimapur, Aami/June 12 (TYO): Universal Immunization Program (UIP) kübok Kiphire District nung June 11 nü District Hospital, Kiphire nung Pneumococcal Conjugate Vaccine (PCV) amenokogo.

PCV amenokba sentong nung o jembiba mapang DPO, (RCH/UIP), Dr. K.Pewezo Khalo-i, PCV vaccine agütsü

koda tongtibang iba indang lemsatepba den iba vaccine ajanga Pneumococcal Pneumonia aser Meningitis nungi kümzüka toktsür ta ashi. Paisa, PCV ya district kübok beneficiaries ajak nem angati agütsütsü, ta ashi.

Pewezo-isa, tsürapurtem dang pei tanurtem anir parnok anasatiba aliba Health Centre tem nung tanurtem hopta 6, 14

aser ita 9 nung vaccine agüjang ta ashi.

Maneni pai Field Health Workers tem dang iba vaccine takok tashi amshitsü aser tanurtem Pneumonia aser Meningitis nungi jenboa toktsütsü ajungshi. Iba sentong nung District Hospital, UIP, WHO, UNDP aser NGO tem nungi staff tem dena liasü.

CECS-i online drawing tetoktepba ka ayongzüka agi

Dimapur, Aami/June 12 (TYO): Alima ajunga nung World day against Child Labour anogo ayongzüka amungba mapang International Labour Organization omen "Act now, End Child labour" dak ajemdaker Community Educational Centre Society-i online drawing tetoktepba ka ayongzüka agiogo.

Iba tetoktepba nung Community Education Centre

School (CEC School) Dimapur aser Rajeshwari Karuna School Tuli (RKS) nungi kaketshir 118-i shilem agia liasü.

Tetoktepba ya RKS Tuli nungi Arozen Aier-i akok aser CEC School Dimapur nungi Deepak Battacharjee aser RKS Tuli nungi Yashmin Khan na tanabuba aser tasembuba jenjang nung liasü.

Community Educational Centre Society (CECS) ya 2005

küm tentet aser iba telok yagi akokba tashi sabang balala nung child labour anema raraa arudar. CECS ya CHILDLINE Nagaland atema Nodal Organization lir, aser parnok tejakdanser teyari aser teküzmükba nungdaka aliba tanurtem nem teküzmükba aser teyari balala agüja arudar, ta CECS Program Officer Toshi Aier-i sangdong ka ajanga metetdaksü.

NPP Nagaland-i Core Committee tentetba ashishi

Dimapur, Aami/June 12 (TYO): NPP Nagaland-i sangdong ka ajanga state sorkari Naga nunger ken o bentettsü atema Committee ka tentetba atema kanga mepelaba lemsatepogo. Core Committee ya kechi dak ajemdaker tentet iba indang metetnua NPP-i ashishi. Tanungbatem yabo Naga nunger masü asü, ta NPP-i asüngdang.

State sorkari iba ken o koda tongtibang aji temulungdang ayutsüla aser nisung/lokti ajak tebilemba magira iba ajanga nüburtem dak koda kongshitsü, ta metettsüla, ta NPP-i ashi.

GOI aser NSCN na tsüingda yimjung atema sensaksema aliba atema core committee ka tentetba ya pongba pongba magitsüla mesera iba ya political party tentet ka masü, kong temulungjem ajemertem tebilemba dang angdang. Iba ya telongjem atema Naga nunger tejangraba ka lir, anungji tebandanga kecha malitsüla. Iba ken o ya lokti tentet ka mesera political party ka tejangraba dang masü. Maneni NSCN-i tawa sangdong ka ajanga Naga yimden yimsüsüba puti otsü ya retreta agitsüla ta shiogo. Iba rara ya anogo aser number dang masü saka puti otsü nung Naga nunger nüjiso asoshi raraba tanüla lir. State sorkari kechiba BJP-i ken o mashiyimi meyipsatsüba atema

telangzüba magütsür.

Shisema aliba ama mezüngbuba nung taoba mapang Naga nungertem tekangshi aser puti otsü dak ajemdaker kuli agizüktsüla, koba ajanga tang iba jenjang tongteta lir. Pei ajangzüksü atema ken o pelepsa, shidakba tebilemstsü mimbanga yura telemtetba shidakba ka magitettsü. Anungji Core Committee-i ken o shidakba mimbanga meyui kechi metetdaksütsü tim aji metetdaksüla, ta NPP-i ashi.

Core Committee nung lokti tentet balala densema alitsüla aser telemtetba ka magi tsüingda nüjiso atema raratem den ken o kanga junga angatettepa sensak asemstsü nungdaker. Nüburtem peladaksütsü atema election matong tsüingda mesera tensa majungba mapang senden kar ayongzüka mena ken o süoki ia agiba mesayutsüla. Party mesera lokti tentet katidangbo nüjiso atema küm aika rara aruba angatettsü makoktsü aser iba mapa atema telok ka mejeta shimtsüji tim masü. Anungji NPP-i, Core Committee nung political party ajak, Apex Civil Organizations/Society ajak züngoksemstsü akhanger, kechiyong Naga nunger tarutsü atema item yagi tongtibang shilem agitsü. Sorkari telemtetba tai ka agia inyakyim meraksatsütsü imlaa atar, ta

kasa sangdong ajanga metetdaksü.

Kasa mapang nung NPP-i, totzü, aser tanga osettem nung jenjang atuba azüoktsü atema state sorkari kechi jenjang agia ali iba indang metetnua ashishiogo. State mapang talangka mokdanga ayur asünung teyari makai nüburtem tali kangshidar ta state sorkari angatettsüla, ta NPP-i ashi.

State sorkari jenjang ajungketba azüoktsü atema kanga junga asadangtsüla, kechiyong iba ajanga nüburtem dak indang indanga kongshir. State mapang talangka mokdanga ayuba ajanga ken o adokbatem bentettsü atema jenjang kecha magi sorkari state mokdanga aliba atsülangshitsü atema telemtetba agiba ya mashi maparen ka lir, ta party-i ashi.

State mokdanga ayuba ajanga mapa mongui akümtsü ana nung aliba tenüngdakbapurtem nem teyari agütsütsü atema state sorkar tasa kechi lir? Kidanger state den oset jenjang nung tebandang tulu aliba ya kechiba? Iba ya shirnoki inyaksar aser kechiba? Shirnoki nüburtem iba tia nungi anitettsüla? Maneni tanurtem kaket shisatsü bushiba nung senti küm aika laluba ya koma asütsü, ta NPP Nagaland, IPR & Media Cell-i sorkar dang asüngdangogo.

Kiphire DC-i tetuyuba talila agütsü

Dimapur, Aami/June 12 (TYO): June 9 nü Home Department tetuyuba aser aser May 12 nü pa tetuyuba dak ajemdaker Kiphire DTF mendenbuba aser DC Rahul Mali, IAS-i sangdong ka ajanga, state mokdanga aliba mapang anidaksü asoshi tetuyuba balala agütsür aliba den bendenloksema ano tetuyuba kar agütsüogo.

Tetuyubatem:

1. No Mask- No Movement aser No Mask- No Entry inyakyim sashishia benoktsü.
2. Aonsotsü, shi/ango, mamatzü, amtsük ayokdak aser local grocery store tem ajak hopta tepeyong anepdang 6 ako nungi 2 ako tashi lapoktsü melatsü.
3. Stationery, mobile phone aser computer accessorie, hardware, gari yangludak aser gari spare parts ayokdak dokantem ajak Hombarnü, Bodhbarnü aser Hokolbarnü lapoktsü melatsü aser Mongolbar, Brehostibar aser Honibarnü shibangtsü.
4. Tekülem sentep ajak maneni shibanga atatsü. Ajisüaka tekülemdak sarasadem mapang aser fellowship bo agidaksütsü, saka nisung 20 dak tema adenshitsu memelatsü.
5. Jongdak maparen tem anepalutsü atema schools/ Colleges administrative office tem lapoktsü melatsü saka officers/Staff kar dang inyaksangshidaksütsü.
6. Ketzangtsür aser staff kari kümtetba core group ka kübok jongdak maparentem

achaayangtsü atema Private business office tem DTF nungi temelaba meshir lapokdaksütsü.

7. Covid-19 vaccine agiba mapang IT support atema District nung Common service Centres (CSCs) tem lapoktsü melatsü.

8. Kisüjensü maparen tasentem tenzüksü melatsü aser SOP leparepranshir aliba dak ajemdaker mapa inyaker tasen aniooktsü melatsü.

9. Tenüngdakba oset, chiyongtsü aser Oxygen / Oxygen Cylinder aser tang medical equipment tem belenshiba garitem senzüsenpongtsü melatsü. Iba den bendenloksema taxi aser light motor vehicles tem senzütsü melatsü saka gari nung nisung shilem 50 dang anishitsüla. Kasa mapang nung tang benoka aliba SOP dak ajemdaker taxi aishirtem ajaki mapa tenzüksütsü atema negative Covid test report sayutsüla. Ajisüaka bus service bo shibanga atatsü.

Senden nung DTF-i, dokan amenertem, dokan nung yaritepertem, taxi/truck anishirtem dak rangloker Covid-19 Vaccine agütsüba sentong tali ajungketshitsü telemtetba agiogo.

Maneni DC-i, tetuyuba agütsür aliba sülen manidaktertem ajak Indian penal Code section 188 aser Disaster Management Act 2005 kübok section tapet dak ajemdaker temerenshi agütsütsü, ta metetdaksüogo.

Tuensang nung COVID Care Center tenzüksüogo



DTF Tuensang mendenbuba aser DC, Kumar Ramnikant, IAS-i, June 11 nü Government Polytechnic Sedem, Tuensang nung COVID Care Center (CCC) tenzüksüba noksa nung angur.

Dimapur, Aami/June 12 (TYO): District Task Force Tuensang mendenbuba aser Deputy Commissioner, Kumar Ramnikant, IAS-i, June 11 nü Government Polytechnic Sedem, Tuensang nung COVID Care Center (CCC) tenzüksüogo. CCC nguteter ya APF & FES lir aser DTF Tuensang, CBLT aser ECS-i teyari agüja amenokogo. Iba centre ya District

Administration Tuensang, Pastors' Union Tuensang Town, Medical department, Police, CKS, KTC, USLB, YTC aser ECS longjemer achaayangtsü. CCC amenokba nükjidong tongtibangtibaji, tashidak keta aliba temaitsü mesayuba COVID tashidak menar alirtem shirnok pei kidang kinungertem nungi pilaa alitsü atema facility peria mali, parnok asoshi lir.

Okadaki YouTuber Paras Singh nem bail temelaba agütsü



YouTuber Paras Singh (achiji nungi tanabuba) (file photo)

Itanagar, June 11, 2021 (Agencies): Arunachal Pradesh kübok Yupia nung Court of Chief Judicial Magistrate (CJM)-i YouTuber Paras Singh bail nung chioxtsü temelaba agütsüogo.

Paras Singh-i Rs 10,000 indang personal bond agütsüba sülen bail temelaba agütsü aser pa dang linük toxtsür maotsü tetuyuba agütsüogo.

"Arishi küm 21 tain YouTuber tepuokdak nungi chioxogo aser pa Ludhiana-i meyipa aotsü" ta Arunachal

Pradesh Director General Police RP Upadhyaya-i ashi.

MLA Ninong Ering-i FIR ka benokba nung ajemdaker Paras Singh apu.

May 26, 2021 nü Arunachal Pradesh Police-i Ludhiana, Punjab nung Paras Singh apu aser iba sülen state-i anir aru.

Paras Singh-i Arunachal Pradesh MLA Ninong Ering dang 'Chinese' ta ajaba ajanga ashishitep ken o tulu ka adok.

"Pa channel repranger aika kümdaktsütsü aser senotsü ajangzüksü atema ashishitep

aketba video ji yanglu. HMLA-i PUBG indang shidi ka züluba atema pa jashi kechiyong

PUBG noktangba ajanga pa senotsü akoksatsü" ta Arunachal Pradesh police-i Paras Singh dang asüngdangya asüba sülen metetdaksü.

"Pa indang video timba ka sen yakta angutsü atema yangluba lir" ta Special Investigating Team SP, Rohit Rajbir Singh-i ashi.

"Paras-i ita ka nung video tem ajanga Rs 20000 nungi 25000 shi aazüker" ta paisa ashi.

JNIMS Imphal nung Covid-19 ICU aser ATC lapok

Imphal, June 12, 2021 (Agencies): Imphal nung aliba Jawaharlal Nehru Institute of Medical Sciences (JNIMS) nung Covid-19 intensive care unit (ICU) aser Accident Trauma Centre tasen yangluogo.

Honibarnü Manipur chief minister N Biren Singh-i ICU aser trauma centre lapoktsü.

ICU nung yipden 100 lir aser Covid-19 agi shirangertem

anepalutsü atema medical facilities tajungtem lir.

Covid-19 ICU ajanga shirangertem tajungtiba nung yaritetsü aser taküm aika kümzüksü.

Külen, Imphal nungsa Covid Care Hospital ka yangludar. Iba ya Defence Research Development Organization (DRDO) den yaritepa yanglu. Manipur chief minister-i

tawa tu iba mozü ki yangludak semdangogo.

"Tanü JNIMS nung ICU / Accident Trauma Center lapoktsüba atema pelar. MP Maharaja Manipur, MLA Sapam Ranjan, MLA L Sushindro, State Health Authority aser JNIMS ketdangsürtemi iba mapa ya ita ka majungdang tembangogo" ta CM Biren Singh-i metetdaksü.

Darrang Police-i taila sen menünger nisung 5 apu



Guwahati, June 12, 2021 (Agencies): Darrang Police-i taila India sen menünga shibelenba maparen ka makdokogo aser iba dak sendakba nung nisung 5 apu.

Police-i taila sen aser sen menünga osettem ngutetogo.

Police-i Bandiya Chapori

kübok tesem balala ana nung nisung punguji apu.


Kharupetia police-i taila sen Rs 17,500 aser ano chichiba sen Rs 13,410 tashi apu. Parnokisa nisung ket nungi printer ka aser blank papers talep ka apu.

"Nisung punguji Ali Hussain (22), Amirul Islam (24), RuhulAli

(19), Inamul Haque (21) aser Saddam Hussain (22) nungertem ta jangjaogo" ta Darrang superintendent of police Sushanta Biswa Sarma-i ashi.

Iba dak sendakba nung ken o benoker bushisüngdang tenzükogo ta Darrang police SP-isa ashi.

Piles Cure Centre - Kabiraj dang alakteta pelaba metetdaksür. Piles, Fistullah, Gastric, Sinus, itching, Tonsil-Ajma aser Diabetes agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajsüaka, tang **H. Umar Chesam contact no.8416087414 / 7627998690** Address: **Burma Camp 2nd Police point opp.** tetuyuba nung anidaka surgery kecha magii (non-surgical) anepalur anogo ishika tsüngda ni taneptsü ngua liasü aser iba sülen tanü tashi kü temang nung timtem kecha mali. **Time: 7 AM - 3 PM -Yours sincerely -Zhubi, Add: Alricy Colony**



**OFFICE OF THE
NATIONALIST DEMOCRATIC PROGRESSIVE PARTY (NDPP)
26 AONGLENDEN ASSEMBLY CONSTITUENCY
"Facta non Verba."
TENÜNGSANG AGÜTSÜR**

India lima nung Assembly Speakers aika rongnungi nisung pezü (4) agi akümba "Committee of the Presiding Officers to Review the Powers of Presiding Officers Under the Tenth Schedule of the Constitution and the rules made thereunder." nung züngsem shimtsüsa pur dang nungi alakteta pei nem nungloxtsüba wadang nung mapa jeta inyaktetba asoshi Wb. Sharingain Longkumer, Hon'ble Speaker, Nagaland Legislative Assembly nem 26 Aonglenden A/C züngsem tulu tila ajaki tenüngsang agütsür.

Iba ama tongtipang wadang nung takok ngua inyaka Naga Kin dang masü saka linük ajunga nem tajangzük bener arutsütsüsa lenir nem Tsüngremi shisatsü aser taküm tajung maojangma.

Sd/- (Nungsangmeren Longkumer) President, 26 Aonglenden A/C, NDPP.	Sd/- (S Lendi Pongen) General Secretary, 26 Aonglenden A/C, NDPP
---	---

Ita ka tain kinü tanur COVID-19 nungi taneptsü angu

Guwahati, June 12, 2021 (Agencies): Assam kübok Bajali district nung ita ka tain kinü tanur kati COVID-19 nungi taneptsü nguogo.

Iba ya Bajali district kübok Sarumanikpur yim nung lir. Hopta ka tejakdang iba yim nung kibong ka nungi kinü tanur dena nisung 5 dak COVID-19 aliba puteta liasü. Iba sülen parnok ajak Salbari nung COVID Care Centre nung aniok.

Ajsüaka, hopta ka lir külen par punguprong dak negative puteta COVID Care Centre nungi anizükogo.

Kinü tanur tsürabur Dhrubajit Kalita aser Nivarani Kalita na dak positive putet



aser tanur taneptsü anguba atema temolung anisüngzükba osang metetdaksü.

COVID Care Centre nung staff aser doctor temi tanur kanga junga anepaluba atema pelar ta tenati ashi.

Kibong ka nungi tanur 4 anentsüh agi anenbang

Aizawl, June 12, 2021 (Agencies): Mizoram nung kibong ka nungi tanur pezü tashi anentsüh agi anenbanga asü.

Tzünglu kanga aruba ajanga Hokolbar aonung Aizawl kübok Thuampui tesem nung anentsüh aika alu. Iba lendong nung nisung ana kanga mejungi yiru.

Tzünglu kanga aruba ajanga construction site ka nung jara ka chirep aser Lalbiakzuala (75) ta ser nisung ka indang ki anenbang.

Lalbiakzuala aser ano nisung kabo iba lendong nungi kümzük saka iba kibong nung tanur 4 tashi asü.

Tasürtemji Lalthlamuani (16), Joseph Lalrinhlua (5), Daniel Lalngaihaka (3) aser Laltanpuui (16) nung liasü.

Iba lendong atalokba tesem ya Mizoram chief minister Zoramthanga indang Constituency nung lir aser pai takoksa anguba kibong nem teyari agütsütsü nangzükogo.

Guwahati Police-i taila doctor ka apu

Guwahati, June 12, 2021 (Agencies): Hokolbarnü Guwahati police-i nija mozü ki ka nung cardiologist ama inyakba taila doctor ka puogo.

Yasüng Fatasil Ambari police station nungi police-i A K Sengupta apu.

Sengupta ta taoba ita 5-6 ka Malati Sen Memorial Hospital nung inyaka arur.

"Fatasil Ambari PS kübok nija mozü ki ka nung Cardiologist ka ama inyakba

taila doctor ka puogo. Anogo ishika tejakdang Maligaon nunga taila Dermatologist ka apu" ta Guwahati police-i Twitter nung metetdaksü.

Maneni, Dibrugarh kübok Chabua nunga police-i Mokalbari tea estate nung taila doctor ka apu.

Iba taila doctor yagi Class 10 tatidang nunga takok menguteti liasü saka 2018 nungi Dr. Stephen Antony ta ser mapa inyaka aru, ta police-i metetdaksü.



TIR YIMYIM

YIMOBILEM (EDITORIAL)

DIMAPUR AMUNGNÜ, AAMI (JUNE) 13, 2021

Tsüngremer lenmang metetba

Tsüngremer tesüngmangtsü mapa metetba aser Pa lenmang, tetezü Pa sentong, metetba naji tetsüngda talangka lir. Asenok aikati Tsüngremer tesüngmangtsü ain mapatembo tangua nguogo aser metetogo saka asenok aikati Tsüngremer sentongbo memetet. Iba jagi aiben asenok junga alinü tashi dang asenoki Tsüngrem dak amangtetter saka kodang timtem tilakata danga ajurudir, asenoki nemnemer aser tangar tsüngrem dangi dena tasüngdangi aoer, kechiyong asenoki Tsüngremer sentongji mangatet aser lenmangji mangu. Tsüngremi inyakba mapatem ajangshiba agi teperi ser Tsüngremer lenmang manguyonga odang aotsü asübo, Tsüngremi pa jakdang kotak tenyar yoktsü tashi nangzüker asünungji, Mosai Kannan lima len jagi odang tsükchirtemji makyonga ola. Mosa asoshi Egypt nungi par nübortem temerem tzüim ana kuma sadanger ali takong nung ajangba kisüngji Tsüngrem pa den adenba kuli tepri liasü. Aseni asübo, joko temerem tzüim ajangteta aruba sülen tobo, Tsüngrema amar asen kisüngi nübortem anir Kannan liji tongtettsü ama bilema anila. Ajisüaka, Mosai Israel nungertem Horeb tenem tashi anir aruba sülena, Tsüngremi pa dang pa jakdang kotak tenyar yoka parnok jakdang aliba tsükchirtem ajak kotak tenyari jagi aridoktsütsü, anungji mamatzü aser ninang mochitsü yima aliba lima jagibo parnok ayongayonga atutsüsa nangazüaka, Mosai Tsüngrem dang 'ni' nü imlibilem aser tadenba metetsüsa kü dang nü lemangtem sayuangma, ta ashiba Anitet 33:13 nung shia angur. Tetezü, Tsüngremer lenmang mangu aser Pa sentong memetet ser tapi agi kotak tenyar sülen anidoktsübaji Mosa asoshibo tarendaktsüka liasü. Mosa asoshi temerem tzüim ajangba, ayadang mana aser ozü shi chidaktsüba, item Tsüngremer tesüngmangtsü sayatenya mapatem ajangshiba aser metetba kisüng jagi teperi masü saka par nübortem tenangzükba li tashiji tonga anir aotsü asoshi Tsüngrem sentong metettsübaji kanga tongtibang liasü. Ibayongji, pai Tsüngrem dang Israel nunger anir aotsü atema Tsüngremi anitsüba lenmang aser sentong meshi aser Tsüngremi agütsü. Ibayongji, Tenüngsang Ken 103:7 nung David chubai Tsüngrem tenüngsanga atenba ken nung, " Tsüngremi Mosa dang Pa lenmang metetdaksü aser Israel nungertem dang Pa mapa metetdaksü," ta shia angur. Kodang asenoki iba tekongji angtettsü merangdir, David chubai ashiba Israel nunger amaji tanü tensa asenok ya lir. Asenoki asenok rongnung Tsüngremi inyakba mapatem aika meteta lir saka Tsüngrem sentongbo memetet aser Pa lenmangbo mangu. Iba jagi Israel nungertem timatempa mapang parnoki Tsüngrem sayatenya nung temerem tzüim atenba to dena amadok aser Mosa anema aiben ain adok aser temerem tzüim sadanga anir adokba Tsüngrem amadok. Aji oda, Israel nungertemi Tsüngremi inyakba mapatembo metet saka Tsüngremer sentongbo memeteti liasü. Tsüngremi parnok rongnung sayatenya mapa inyakba aika parnoki meteta ajangshi saka parnoki Tsüngremer lenmang memetet. Iba jagi , aiben parnok asoshi tenangzükba limaji tiyazü tenangzükba amato parnoki bilem südi. Asenoka Tsüngrem dak masü Tsüngrem sayatenya nung amangba purtem aika lir. Aji oda, asenoki Tsüngrem sentong angatettsü meranger masü saka Tsüngremi asenok rongnung sayatenya mapa inyakbatem dang metetnür. Ano ken, asenoki Tenüngsang Ken 103:7 nung, Tsüngremi Mosa dang Pa lenmang metetdaksü aser Israel chirtem nem Pa mapa metetdaksü ta asübaji angatettsü merangra, Israel nungerji tanü asenoka ta angatettsü. Kodang asenoki asen den Tsüngrem adenba memeteti Pai asenok rongnung mapa inyakba indangang metetnua atadir, asenok asoshi ibaji lendong atar amato asütsü. Tsüngrem lenmang mangu ser asenoki Tsüngrem dang temoatsü, takok aser tajung ajak meshir. Aji oda, Tsüngremer sentong memetet ser asenoki taneptsü aser arishi meshir. Ajisüaka, Tsüngremer sentongbo taneptsütsüji masü asünungbo kada sütsü ? Aji oda, Tsüngrem lenmang mangu ser asenok aotsüba lenmang indang dang bilema temoatsü aser takok meshi nung ajungtsü asü ? Kodangsa asenoki asen taküm aser kibong nung aser asen lima aser lokti nung Tsüngremi inyakba mapatem ajangshidir, asenoki ano Tsüngremer lenmang metettsü aser Pa sentong angatettsü merangtsüla. Iba jagi dang, asenokia tenyar Pauli amangtetba amaji tatem tashi akangakanga amangtettsü.

OLEMSABANG

TEYARITEPER AYUBA TSÜTSÜ KIBONG ASER AROGO TEINYAKTSÜ

~ Rev. Mapula Lemtur

Yanglushidi Sensaksem Sabang (YSS) nung jembiba onük aika rongnung kilir (Teyariteper) ayuba ya kanga retreta jembitepogo. Yangi kodang "kilir" ta asenoki alar ama, aseni alizüka ayuba ama mesüra aseni meinyaknuba inyakdaksütsü ayuba amai bilemer asü nung, iba ocet nung "Teyariteper" mesüra "Teyarir" ta amshiner. Kibur tajung ajanga aika ajangzükdakja, mulungdangtsü otsü jenti lemsatepogo. Kar otsü ashidangbo meimchir asüktemtsüsa tansütsü tatalokba lemsatepogo. Iba dak sendakba nung tenur Sashikümla-i, melepmezünga teyariteper koda ayutsü aser anepalutsü indang ocet tajung ka zülüogo. Ni iba nungji dang metenloka teyariteper ayuba tsütsü kibong aser Arogo teinyaktsü indang tatsüka lemsateper.

Kibur aser Teyariteper tesendaktep

Asen Aortemisa teyariteper teimba ayur aser jilo ajitepba ka mesüka yuteper. Kodang eyariteper ka asen dangi arur, sensaker kibong nungi school zünger saka teyari makokba agi arur. Karbo machi-majemer, tuokrong maremer teyari terara dang süaka taah atema yoker. Kari yamai ashi (Kü dang ashiba), Aorji advanced kin asünung parnok kidang alibaji Aor mesüka intettsü ta sür yoker. Yamaji nükjidong balala yur asen den arua teyariteper alir.

Tsüngrem meimba kiburi pari yimlaba dang nungi kanga agi tajungba amshir. Pei chir den kasa amshir. "Kilir" ta asüba ojangji kidang mejembidaktsür. Oja, oba nungi shir odi, oya, tebu, tenü ta jadaktsür. Pei chir ayipba taktang nung mejangdaksür. Külemi kasa langpang nung mener chiyonger, külemi school-i yoker aser tependang mali mapa lema inyakdaksür. Bible school, Theological college nung züngdaksür par lima nung takok ngua Tsüngrem wadang inyaker. Karbo pei yari mapa bushitsür, secular field nung mapa tajung ngua, mapang shia kibur semdangi rongsen tulu bener arubatem lir (nai kechi peroker aji dang nai arutsü).

Aor yimya ajizükdaktsütsü yok ta asürji tajungtiba agi asüngteta lidaktsür, kechiyong tanü nai kechi sayur itemji Aor ajak tenüng nung ta meteta asen tebor tajung kin ya tenüng memenükdaktsüsa inyaktsüla. Iba tangatetba nung anitetba jala karbo asen nisung tajungi agir azükarua lidar.

Taah atema yokba teyariteperji temeim akaba kibur pa/la kisüng masü, saka kibong ajunga anir arua (lenden lima nungi) pei tzülu farm inyakdakja ki sütsür nungdak ajak perija item kibong nungjagi school-i yoka tajung kümdaktsüba lir. Item mesükba mapa tajung inyaker kibur nisung tajung aika ni alidak arogopur angudang Tsüngrem tenung asanger.

Pei taküm mazüoktetba kiburtemi tangar dang masü, pei chinur taküm-a raksatsür. Item kibong nung teyariteper ka takümji aiatai. Tila tanur asüdang nungi yi, drug, pan alilen senzüdaktsür. Sentep aser school nung temesepba chiyungtsü machitsü angazüker arur, saka kiburi yi, moko, sali alie yoker, mooli asünung tamen kuma teper mechiyungdaksüi mejangdaksüba ajurua aruogo. Mapa alidangbo schoolia meyoker, exam mapang lesson bushitsü mapang magütsür aser tatidang magütsüdaktsür. Teyariteper mejangtsü atema ak ki, an ki, süng ki anasa pei ki nungi pila-a taktang tilala yanglutsür. Aiben tajemzükba kibong nungi arur asü nung aseni dena merükmejutsütsü mapang, saka senzüka toktsüdang mezüng anir arutsüba dang tamajungba liteter yoker. Tanur karbo ak chi abeni arem talangi or adoka ano ibaji alangsa ak ajebtsü anebaludang belemsüka lumiseter amozüka or aliba tia lir. Tila teri oset kar sama nung teka alena yur temulung shirangtsüka jeba züka merenshir. O tajung agi tera metongshitsü nunga ajungtsüba sür kiyong sangdoka merenshidang tanur taküm piyong atema zübu/tarak kettsür.

Hau, teyariteper ajakji tajungdangbo malir. Karbo azümesen, tekalen majung alir, saka itemjia sarasadema meima amshira lokti atema senso tajung akümer. Anungji kiburi pei teinyaktsü memetetra temoatsü melen atakatem-ang ajangzüktsü. Yamaji ataloka aruogo. Tanü aseni nisung ka junga anitetba jagi asüng kin ka atema takok bena arutsür asütsü. Parnok kechi nükjidong nung aru ibaji atalokdaksütsüla aji mesüra tesülen süngjang tamajung atangtsü aser iba ta-aji kanga taku asütsü.

Teyariteper ayuba lendong

Tsüngrem aküm metsübuba kibong nung teyariteper ayuba lendong aiben bener arur, yi jemer kiburi yariteper anir aruba tetsür den tashiyim agi raksatsüba (rape case). Kinungtsüria teyariteper den kazüba, joko teyariteperi meyiper kiburla mezüngmeshi tenzükba (husband's mistress) ataloka arudar. Teyariteper nem tanur reprangdaksüba, tetsü, tebu na dang jashiba mang yanga tanur kechi nüki agi mereprangtsüka rishikangshiba; teni tepang nungi azü alua maokja metsüshia amshiba angashiogo. Küm ishika tejaklen teyariteperi tanur tepseta toktsür ajenba atalokba ajaki meteta lir. Teyariteperi hon, taribi, oda tetsü-tebou nungo oset ajak auyar ajenba metetogo. Anungji kanga shisadanger külen aseni kibur ka teinyaktsü metet nung dang teyariteper ayutsü merangtsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Vietnam nung Covid wara mapang Khristanem anema inyaker



June 06, 2021 nū Vietnam kūbok Ho Chi Minh City nung Khristanemi sensakertem nem chiyungtsū lema agütsüba noksa nung angur.

June 12, 2021: Tang Vietnam linük nung coronavirus wara mapang nung sorkar ketdangsertemi Khristanem anema inyaker aser house-church organization ka anema-ken o benoka bushisüngdangdar, ta osang ka ajanga metetdaksü.

Tawa Ho Chi Minh City nung Revival Ekklesia Mission (REM) nung adener apuani na temang mejungi Gia Dinh General Hospital-i aoba sülen ketdangsertemi nisung 20 dak tema adenshia tekülem sentong magitsü tuyua liasü, ta REM lenir, Rev. Vo Xuan Loan-i metetdaksü.

Khristan apuani na dak coronavirus putetba sülen REM Center nung züngsem 211 dak-a coronavirus putetogo.

Iba sülen ketdangsertemi

REM registration anentsüba aser REM ajanga iba wara prok, ta tai tonglokja police-i iba telok anema bushisüngdang tenzükogo.

Deputy minister of Home Affairs-i, REM-i ozüing alema inyakba putetra parnok indang registration teti atema anentsütsü akok, ta metetdaksü.

REM co-directors, Rev. Vo Xuan Loan aser la kinüngbu, Rev. Phuong Van Tan nati tentetba REM telok mapang tatsüka atema registration anentsür saka parnoki ozüing alema inyakogo ta aitsüra teti atema registration agientsü.

Vietnam nung ozüing tesashi ajanga Catholic aser Evangelical Khristanem napronglai timtem ajangshidar. REM-i ketdangsertemi tuyuba

ama nisung tali adenshia tekülem sentong magi, ajisüaka tekülem nung adenertem dak iba tashidak putetba maongka agia ketdangsertemi

house churches nokdang.

Deputy minister of Home Affairs, Gen. Vu Chien Thang ya Government Committee for Religious Affairs (GCRA) nunga chairman lir aser pai, REM ya Arogo ka masü anungji iba telok nung lenirtemi parnok sasa "reverend" mesüra "pastor" ta ajatsü makok, ta metetdaksü.

Alima nung Khristanem reshikangshiba linük tamajungtiba 50 rongnung Vietnam ya jenjang 19buba nung lir (Christian support organization Open Doors' 2021 World Watch List).

NE India nung Khristanemi longjemer wara anema rarar

June 12, 2021: Northeast India nung aliba state tem nung Catholic Arogotemi tanga Khristan teloktem den longjemer coronavirus wara anema raradar; talisa lisopurtem aser süngo lu nung inyaker tem iba wara nungi jembua lidaksütsü atema inyaker.

Khristan lenirtemi ashiba agi, parnok atema tongti nukjijongji Assam nung süngo lu 800 nung inyaker tem iba wara nungi kümzüksü atema lir.

Dibrugarh Arogo nung tongti putir, Albert Hemrom-i, "Coronavirus wara tanaben prokba mapang onoki Assam nung tongtibang yimtem kar nung rangloker inyak, ajisüaka tangbo yimtsüngtem nung, talisa sensakertem aser süngo lu nung inyaker tem iba wara nungi jembua lidaksütsü atema inyaker," ta metetdaksü.

Khristan volunteers-i iba wara nungi kümzüka alitsü atema awareness agütsüba den külemi süngo lu nung inyaker tem nem chiyungtsü lema agütsüdar.

Northeast India nung aliba state tem ya kilometer 20 corridor ajanga pilar, koba dang Siliguri Corridor ta ajar aser item states rongnung state pezü-Arunachal Pradesh Meghalaya, Mizoram aser Nagaland state

tem bo Khristan nütsüng timba aliba state tem lir.

"Iba wara mezüng prokba mapang nungbo onoki timtem majangshi saka tangbo yimtsüngtem aser süngo lu nung inyaker aika dak coronavirus putetdar," ta putiri metetdaksü.

Yaküm January ita nung coronavirus mezüng prokba mapang nungbo northeast state tem aika iba wara nungi jembua liasü saka taküm April ita nung iba wara tanaben prokba mapang nungbo state aika iba wara agi kongshiogo.

Northeast nung nütsüng timba aliba state- Assam nung nütsüng million 30 shi lir, aser iba state nung tang tashi anogo shia nisung aika dak coronavirus puteter. June ita mezüngbuba hopta nungbo Assam nung anogo shia nisung 4,000 tema dak iba tashidak putetba den anogo shia nisung 40 dak tema süa liasü.

Osangbener den jembidang putir, Hemrom-i, süngo lu unung inyaker tem ki kanga nentepa lir aser takdang kanga tila, ibayongji süngolu nung inyaker tem aliba tesem nung iba tashidak kanga kera prokshir," ta putirisa metetdaksü.

Golaghat district nung putir, Caesar Henry-i, Arogoi

awareness agütsüba den külemi timtemertem nem chiyungtsü agüja arudar, ta metetdaksü.

North Eastern Regional Bishops' Council Deputy Secretary, G.P. Amalraj-i, Assam nung dang masü saka Northeast nung tribal nütsüng aika aliba tesem ajak nung wara ajanga kasa timtem ajangshidar, ta metetdaksü.

Khristan volunteers-i yimtsüngtem nung sensakertem nem mozü, chiyungtsü aser rations lema agütsüdar, iba denji külemi Arogoi toll-free number ajanga counseling agütsür, ta pai ashi.

Assam Christian Forum nung otongdar, Allen Brooks-i, northeast nung tang wara tensa ya kanga majung, kechiyong lisopur aikati Coronavirus anema tetuyubatem junga mebenshir, ta ashi.

"Vaccine agitsü melunga alir lanurtemia vaccine agitsü atema online ajanga register mesüteter, aser ibaji light majungba aser internet connections majungba agi lir," ta Brooks-i ashi.

"Arogotem ket nung senotsü peria mali, anungji nüburtem taküm kümzüksü atema sorkar agencies den külemi longjemer inyaksü nungdak, ajisüaka onoki akokba tashi meranga inyakdar," ta paisa metetdaksü.

ANOGO ABEN TSÜNGREM DEN

SENSAKER DANG YARIBA TEPEN

"Shibai sensaker dang aria bilemer pai Kibuba nem aputsür, aser pa mapa tajung asoshi pa nem Pai shia agütsütsü." (A. Shin 19:17).

Tangar asoshi asen teka temoatsüba ka asütsü sarasadem ka - kotaker Oba, kü teka lapokjang!

Ne teka teti salaa lir. Pelaa agizükba aser moatsüba teka. Kodang Ne chir kangki nung Pa teka salar asü Nai ibai tabensa jungkai adoktsü.

"Mulungsoa agütsütsü kü teka salajang, Kibuba. Kü teka ajitrepatokra ni koda junga asazüka agütsütsü? (Luke 6:38). Kibuba Yisu O ni teti bilemetta alitsü kü dang yariang, "Tagizükba dang nungi tagütsüba tali temoatsüba" (T. Mapa 20:35). Nai onok nem Ne chir aser Ne Tanela teti tatem makai agütsü. Nai onok nungi tajung kecha sotta mayur (Rom 8:32). Kü tekai agütsütsü tekara aser agizüksü milungi südakjang. Kotak nung kü rongsen rizüngjang (Mt. 6:19-20).

"Kibuba, tashi maitertem yaritsü kü teka songlajang. Zükla alir yaritsü asoshi kü teka Hur aser Aaron teka ama lidakjang (Anitet 17:12). Ni kü teka melen tebilemba tagütsüdaksü. Azüa aliba tzütok ni mesükdangtsü aser mokozü alungba mi meremseptsü (Mt. 12:20).

Timtem nung alir yaritsü kü teka salajang. Tanü alima nung ni Khrista temang züngsem ka ama Pai Pa taka salaba ama kü teka salajang. Sensakertem yaritsü asoshi kü teka kodanga ania tekümdaksü kechiaser alima sensaker teti alitsü ta nai ashi (Tazüng. 15:10-11). Ni maneni asüngdang aser Nai menungnangi agütsür (Yakob 1:5). Süra ni sensaker ken dang nungi tali meshir arutsütsü?

Temeim Oba, ni Ne nem magütsüdag kü tekai kwiben temenen mapa inyak! Ni tang aria bilemba mapa inyakdakjang. Ni kü teka Ne sabang nung yutsür, Na meteni ni kecha inyaksü makok. Kü dang yariang ta ni Yisu tenung nung sarasadem. Amen.

Temeim Khrista nung amangbapurtem,

Tanü Naga limai Khristar yimsu arur SESQUI CENTENNIAL Nov. 2022 nung amongtsü asenok ajak TSÜNGREM nungi temoatsü angutsü asoshi amangbapurtem ni nungi shir tuluba tashi pei kipong tekülem sentong nung aseni menaba tai temenentem tatok nangzüka sarasademtsü onuk kar lemsatepba zülur.

1. Tsüngrem osang tajung arur ,tanü tashi YIM O YIM na tsüngta yimjung mali.
2. Revernd bu angu saka tekümtet tejangja memetet.
3. Tasoba küm ochi mashiba /kümsuk agi tonger saka sodi memeshiba ajanga santem tai menadaksüba.
4. Arogo nung ochi mashi rongsen tenla aser ter shilem ketdangsurtemi ochi meinyakba ajanga tanular taginuba arogo samadaksür.
5. Tenzükertemi anir shi azüapongba aser nuktapangtaba.
6. Khristar arogo tamang mapa den mesutepi meshimetsüa project balala inyakba.
7. Tenzükba mapa nung tejak ajia shimba, aser nutsüng karbu temsua liaka, kecha shilem magidaksüba.
8. Tazüngba degree tulu lir saka tela mekümteter.
9. Tenzüker menden nung renema yur, lokti senden jazükba.
10. Arogo tenzüker menden nung nisung kati melongba nung lemteta inyakba ajanga khristar arogo rajang kümdaksüba.
11. Arogo home mission ajanga lanur tazüngertem yariba mapa nung, tekolokbo tajung saka meshimejungertem nem mezüngbuba shilem magütsüba inyaksim nung Tsüngrem jashidaksüba.
12. Nutsüng nuburi Arogo nung toklang tenzükerterem dang temeim mapa inyakba nung bensa-a inyakba.
13. Alima ainba den jangyu medema, arogo nung toklang tezükerterem nem tim teyaritsüyim magütsü sota ayuba.
14. Nuburtemi Arogo nung tenzükerterem tashi maitba indang temeim agi metongshitsütsü melena tezü nung oagi nungsen jembitsüba.

Anungji SESQUI Centennial tenung nung missionary merijang ter (1000) yoktsü asoshi Tsüngrem den tanaben tezüngzüktep yanglushitsü aser Impur mission hospital tuluba küma pangzüng yanglutsü Tesungrem dang sarasadema atadi ta ayongzüker.

- Bendang Imsong (Social Activist)

OLONG PAITEP # 5842

1						2				3
								4		
5		6				7				
8										9
									10	
					11	12				
			13							
14						15				
			16							

TIPILEN		LANGTSÜNGLEN	
1. O jembitsü tashi	- 8	1. Tepok telung nung shilem ka	- 7
5. Süngjang tapu ka	- 5	2. Tamajung aküm	- 5
7. Tekanük nung enokba	- 5	3. Chi den külemi achiba	- 3
8. Teka amtep	- 5	4. Meimchir alimai aruba	- 3
12. Tzüc asendak	- 5	6. Laishiba nung ayong ka	- 4
14. Tsünpang tema aliba	- 5	9. Tarutsü nükla	- 7
15. Ken atenba yimya	- 5	10. Tamendakdak/Nükjidong	- 4
16. Asangur	- 8	11. Tenük-telen mejungi aküm	- 5
		13. Terok nungi adokba	- 3
		14. Meimchir telemsa	- 3

OLONG PAITEP # 5841 TELANGZÜBA

TIPILEN :		LANGTSÜNGLEN :	
1. Taa, 3. Teküm, 6. Aibelen, 7. Aut,		1. Tai, 2. Asensor, 3. Tanü, 4. Kua,	
9. Ajizük, 10. Ojala, 11. Semer,		5. Mitsüksü, 6. Azübenshi, 8. Lah,	
13. Sen, 15. Kioktsü, 17. Itsük, 18. Kar.		9. Jangkok, 12. Akok, 14. Nashi,	
		16. Sür.	

KOMA SÜLA TELANGZÜBA

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser turlurtemi chia-adok nunga koma süla ?

Covid 19 Sen yimsüsür aser turlurtemi sen ajak masü tera danga chia-adok nungbo parnokji nisung tepsetba den sako asütsü, nisungi mangutsü Tsüngrem nem dang nungloktsüti aiatai asütsü.

-SMS

Tilartemi ano tali tilaba akümstsü arema lir. Sensakertemi ano Tali Sensakpu akümyonga arema dang lir. Anungji Covid-19 tongpang nung amshitsü yokba sen ajak yimsüsür aser turlurtemi chia-dok nunga kecha masü; saka Lockdownji-ang agientsüla. Tilartemi aser Sensakertemi tasütsü tsübuu mali-nung parnok ajak sümar külen Yimsüsür aser Turlurtemi kisung jangratema li-mesodang-ang ka-ka, ka-ka ajangjemtsü.

-C.R. NUV.

Center government nungi Nagaland atema covid-19 tongpang nung amshitsü yokba sen ajak yimsüsür aser turlurtemi chia-adok nunga oda kecha masütsü ati. Asen Nagaland atemabo CBI-a mali aser NIA a mali. Oda "Kecha mahar, parnok-iang chimara odang dokjang" ta pilemba Naga nunger dak ali tashi tachir kabo kanga jangratema achitsü ati!

-WhatsApp

Turlurtemi item sen kodanga majitsü.

-WhatsApp

2020/2021 küm covid-19 atema centre govt, Arogotem, lokti balala, turlur/takar nungi angati teyari sen crore aika aruogo. Iba sen shiri chiogo/chidir künü iba sen jagi parnok achitsü.

-M.A.Ao, 4th mile

Nagaland nung Arogotem, lokti tentet palala, turlur/takar temi iba covid-19 wara atema tesüngmangtsü tenla agütsür saka asen Nagaland CM-i kechiba pa side nungi Naga nunger nem tryari tenla magütsür? Paper nung covid-19 atema endokba sen district balala, hospital Balala nung nungdakba oset alia agütsüba ya pa sen masü asen Naga nunger ajak sen lir.

-WhatsApp
(Maneni tapak 9 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Ka

(n) Züngya azüngdang mezüngbuba (one)

* Kü tesayuri kü nem kaket **ka** agütsü.

Ki

(n) talitsü yangluba tesem (house)

* Ozü **ki** tuluka yanglua lir.

NAI-A YA METETTER MA?

ALIMA NUNG JENJANG TULU AKETBA METEORITE KAR:

1. The Fukang Meteorite - €1.7 million
2. The Main Mass of the Brenham Meteorite - €896,000+
3. The Willamette Meteorite - €851,000
4. The Conception Junction Meteorite - €724,000
5. The Springwater Meteorite - €511,000
6. The Zagami Martian Meteorite - €383,000
7. The Chelyabinsk Meteorite - €336,000
8. Dar al Gani 1058 Lunar Meteorite - €281,000
9. The Main Mass of Zagami Meteorite - €278,000
10. The Gibeon Meteorite - €280,000

TANÜBO NAI LANGZÜANG

Q. Shibai International Business Book of the Year award 2021 takok angu.

- A. Nitin Rakesh
- B. Jerry Wind
- C. Both A and B
- D. Pushkin

(Taruba adok nung onoki langzüksü)

YASHI ADOK TELANGZÜBA : Ladakh

SUDOKU # 5884

TELANGZUBA # 5883

2	6	5	1		8	9	3		5	9	8	1	4	6	3	2	7
7		9	5	6	3				6	2	3	8	5	7	9	4	1
			9	7					4	7	1	2	9	3	8	6	5
1	9	3				8		2	1	5	6	4	2	8	7	9	3
			8		6	3		1	8	4	2	3	7	9	1	5	6
8	2					7	4	5	7	3	9	6	1	5	4	8	2
4	3				9		8		9	1	4	5	3	2	6	7	8
6	5				4		7	9	2	6	7	9	8	1	5	3	4
	7		6	8					3	8	5	7	6	4	2	1	9

OJANG LUTEP # 5428

- LOTEK :
- UNNG :
- ZÜOTAKBA :
- HAKEC :
- LIBMAA :
- NGAJAA :
- JAMAYPANGIMI :
- EPI :
- ÜTSSÜNÜ :
- SÜTSDAKÜ :

OJANG LUTEP TELANGZÜBA # 5427

**TEBANG AGI RASAA MESHITET MANGUR DENBO
KOMAANG OTSÜ MEDENLOKA MEJEMBI**

TAN HOPTA ATEMA - KOMA SÜLA ?

Q. Private mozü kidang Covid agi shiranger anepaluba jenjang (treatment charges) ya government-i sensaker lenji tera oa latettsü nunga koma süla ?

J&K kübok Sopore nung kiralongrartemi amakdang nisung 4 asü



June 12, 2021 nü Srinagar kübok Sopore jila nung kiralongrartemi sepaitem amakba mapang nung yirur civilian ka hospital nung yariba noksa nung angur. Kiralongrartemi amakdang police ana densema civilian aika asü aser asem yiruogo.

Srinagar, June 12 (Agencies):

Honibar nikongdang Srinagar nungi kilometer 55 shi pilar Sopore jila kübok Armpora area nung kiralongrartemi police party ka amakba mapang nung civilian ana aser police ana süogo, ta osang ka ajanga metetdaksü.

Kasa lendong nungsa civilian ana aser police ana yiru.

Police osang ajanga ashiba agi, Honibar nikongdang 12:30 ako meta kiralongrartemi police gari dak injang khaloktsüba mapang nung civilian ana aser police ana asü. Police ana aser civilian ana yirua Srinagar-i anir oa treatment agidar.

Police party ji curfew ozüing sangdonga senzüba mapang nung kiralongrartemi grenade aser injang amshia parnok amak.

Police ana aser civilian ana sub-district hospital Sopore-i anir ao saka hospital atongdangbo süadoker liasü. Kiralongrartemi amakba sülen army, police aser security sepaitem iba area longbanger kiralongrartemi bushi

tenzüokogo.

Iba tatalokba aija Peoples Conference chairman, Sajad Gani Lone-i twitter ajanga, "Iba ama tamashi mapa ya kodang anentsü. 1989 küm Kashmir nung prangpong amshi tenzüok, iba sülen küm 32 jungogo. Nüburtem kümzüksü atema amshiba prangpong agi nüburtem takoksa angur. Prangpong amertemi parnoki shirmok atema rarar, ta parnok sasai shisadangtsüla," ta ashi.

Taoba mapang Jammu & Kashmir Chief Minister aser National Conference lenir, Omar Abdullah-i, "Item ama tatalokba ya sashia aitsütsüla. Nisung samaba anentsü atema sokrari inyaksüla," ta takhangba agütsü.

Taoba mapang Chief Minister, Mehbooba Mufti-ia, "Prangpong amshia amakba ajanga Kashmir onük mebantetsü. Kashmir teblemetsü onük atema prangpong agi kecha masütsü. Delhi prangpong agi süaka yangi

aliba lanurtemi amshiba prangpong agia süaka Kashmir onük mebantetsü," ta metetdaksü.

Item ama tatalokba ajanga Kashmir nung tenüing ang menüksür aser Kashmir nung dang kiralongrartem ta ajar, ta laisa ashi.

Apni Party Tir, Syed Mohammad Altaf Bukhari-i, "Rara agi kodanga telemtetba magiteter saka loktiliba nung yimjung aser terenlok dang raksatsür. Kiralongrartemi nüburtem timtem ang tali bendenloktsür. Yimtenren telok balala süaka, tangatetba balala süaka aser yimsü balala süaka raraji kodanga magizüktetsü," ta ashi.

"Rara ajanga Jammu & Kashmir nung loktiliba raksatsür aser meimchir taküm jenti samaogo. Tesüiba küm 30 tsüingda rara ajanga nüburtem rongsenkettsüing aser loktiliba jenjang mejungi raksatsüogo," ta paisa shisem.

Coronavirus tanaben prokba mapang doctor 719 süogo: IMA

New Delhi, June 12

(Agencies): Coronavirus wara tanaben prokba sülen tang tashi nung India nung doctor 719 coronavirus tashidak agi süogo; doctor timtiba asübaji Bihar nung doctor 111 aser Delhi nung doctor 109 asü, ta Honibarnü IMA-i metetdaksü.

Indian Medical Association (IMA)-isa, Uttar Pradesh

nunga doctor 79 asü, West Bengal nung doctor 63 aser Rajasthan nunga doctor 43 süogo, ta metetdaksü.

June 7 nü Indian Medical Association-i shidi ka ajanga Ato kilonser, Narendra Modi dang medical mongintem kümzüksü atema Association-i mepishiba onüktem agizüksü asoshi nai tiyongtsü ia inyadaksünér, ta mepishia

liasü.

IMA-i Ato kilonser dang, wara mapang nung doctor tem aser health care worker temi kecha tetsübu makai duty shidak inyaksüsa inyadaksünér, ta mepishi.

IMA-i ashiba agi, 2020 küm India linük nung coronavirus tashidak prok tenzüokba sülen tang tashi nung doctor 1,400 dak tema süogo.



June 12, 2021 nü New Delhi nungi video conferencing ajanga Union Finance Minister, Nirmala Sitharaman leniba nung 44buba GST Council senden amenba noksa nung angur.

PM-i India nung masü saka yimten tongtibangba kümdaksü: Priyanka

New Delhi, June 12

(Agencies): Ato kilonser, Narendra Modi-i coronavirus anema junga ketdang mesüteter, ta aija Honibarnü Congress lenir, Priyanka Gandhi-i, Ato kilonseri India nung tama masü saka yimten tama kümdaksür, ta aitsü.

"Zimmedaar Kaun (ya shiba khuret)" campaign kübok Congress general secretary, Priyanka Gandhi Vadra-i Centre sorkari coronavirus wara anema junga meinyakba atema tasüingdangba balala asüingdanga arudar.

Coronavirus wara mapang nung Ato kilonseri junga yimsü mesütetbaji alima ajaki kuli süa metetogo, ta lai ashi.

Facebook, Twitter aser Instagram accounts ajanga lai, "Pai (Modi) tesülen atsüingzük aser tensa tamajungba süidaksütsü atema ataa liasü. India Ato kilonseri tasümaiter ka amai inyak. Pai linük jenjang ludaksü," ta aitsü.

"Pa atema India nung tama masü yimten tama. Pai ochi magizükteter saka olulu agizüker. Nüburtemi pa dang ya shiba khuret? ta asüingdangtsü mapang tongogo," ta lai ashi.

"Timtem mapang nung ochi agizüktetsüla, khuret agizüksüla aser mapa

inyaksüla, saka tia makai Modi sorkari kecha meinyak. Ajisüaka wara tenzüokba mapang nungi sorkari ochi mimbangtsü merang aser khuret magi," ta lai aitsü.

"Ibaji ajanga wara tanaben prokba mapang nung sorkari kecha meinyaktet. Kecha meinyaktetba ajanga wara sashia prok aser tebang agi mejembitetba timtem ajangshi," ta lai ashi.

"India aser alima nung mongintemi tekümdangtsü ashiba nung ajemdaker Ato kilonseri inyak asü nungbo, mesüra pa indang 'Empowered Group' aser Parliamentary Committee on Health-i ashiba ama tashi anga asü nungbo yipten, oxygen aser mozü agi manüingla," ta lai ashi.

Ato kilonseri India nung taküm kümzüksü atema meblemilemi bendangertem nem coronavirus vaccine dose million aika agütsüogo, ta shia Priyanka-i, "Ato kilonseri pa tenüing ajungkettsü atema meblemilemi India nung tama südaksü asü nungbo tanü amai asenok vaccine agi manüingla," ta ashi.

"Pai mejanga aliba nungi saaker 2020 küm tom nung vaccine manga asü nungbo pai nisung jenti kümzüker lila," ta lai ashi.



June 12, 2021 nü Jabalpur nung aliba NSCB Medical College kima nurse temi parnok itasen tujang aser permanent mapa agüjang, ta takhangba agüja longkak aitba noksa nung angur.

India nung Covid agi ano nisung 4,002 süogo

New Delhi, Aami/June 12

(Agencies): Tanü (June 12, 2021) agi anogo pongunü buba India linük nung anogo shia nisung lakh 1 den tajemba dak coronavirus tashidak puteta arudar, aser tesüiba ghonda 24 nunga linük nung nisung 84,332 dak dang coronavirus putetogo, ta Honibarnü Union Health Ministry-i metetdaksü.

Tang tashi nung linük nung coronavirus case ajak agi 29,359,155 jungogo; tesüiba ghonda 24 tsüingda coronavirus agi shiranger 4,002 asü aser linük nung iba tashidak agi asür ajak agibo 3,67,081 jungogo, ta Health Ministry-i metetdaksü.

Tang linük nung iba tashidak

agi teshirangdakpur 1,080,690 dang lir aser iba tashidak agi shiranger shilem 95.07 (nisung 27,911,384) anepogo.

Anogo shia coronavirus positive putetba shilem 4.39 dang kümogo aser tesüiba anogo 19 tashi positive rate 10% den tajemba lir, ta Health Ministry-i metetdaksü.

Hokolbarnü sample 20,44,131 tendangogo, aser tang tashi nungbo linük nung samples ajak senteper 37,42,42,384 tendangogo.

Tanü agi anogo 30 nübuba anogo shia coronavirus agi shiranger anepba dang nungi iba tashidak putetba tajemba, ta Health Ministry-isa metetdaksü.

Kim Jong Un-i military tashi ajungkettsü ayongzük



Kim Jong Un (File photo)

Pyongyang, Aami/June 12 (Agencies): North Korean media sangdong balala ajanga, linük lenir Kim Jong Un Central Military Commission senden ka nung adenba aser military tashi tali ajungkettsü atema ayongzükba Honibarnü metetdaksüogo.

Workers' Party indang osang

kaket Rodong Sinmun sangdong ka ajanga ashiba agi, Kim yashi senden ka nung denogo, ta NHK World-i metetdaksü.

Kasa sangdong ajanga ashiba agi, senden nung shilem agirtemi, Korean Peninsula nung tensa kanga kara melenshiyonga aoba dak rangloker national defense dak sendakba nung onük balala benoka sensaksemogo.

Senden nung Kim-i military dang linük kümzuka ayutsü atema inyaksangshiba mapang tali kümküma alitsü metetdaksüogo.

Taoba mapang North Korea yimsü asüba party yongtsü nung temelenshi tuluka adoka Kim Jong Un kübok lenir tasen ka shimogo.

Workers' Party of Korea (WPK) temzüng ozüng lepareprangshiba mapang iba mapa ya January ita amenoka liasü.

Ajisüaka iba mapa atema shiba shim iba indang osang tejangja mali. Mongintemi ashiba agi, iba mapang atema Jo Yong Won mesera Kim Tok Hun shimmer alitsü. Tena ya North Korea sorkar kübok kanga tashi tait lenir ana lir.

Jo, shiba arishi küm 60 tain lir aser Kim Jong Un talangtiba tenzüksang aser kanga dang temulung adokba lenir ka lir, pa WPK central committee secretary lir. Pa mapang aben North Korean lenirtem den külemi tangokba noksa nung ngua arudar. Kasa mapang nung Kim Tok Hun ya North Korea sorkar premier lir.

North Korean state media sangdong ka ajanga ashiba agi, taküm Jo aser Kim na lenisüba nung senden balala ayongzuka menogo aser linük kübok tesem balala sendangogo, koba taoba mapangbo Kim Jong Un kijai achaayanga liasü.

Brexit dak sendakba ken o ojang dang sensak asemtsü: Macron

London, Aami/June 12 (Agencies): France tir Emmanuel Macron-i Honibarnü British Ato Kilonser Boris Johnson dang, Brexit divorce deal framework nung sign süteper aliba nungi masetshitsü shiogo, ta AFP sangdong ka ajanga metetdaksü.

Macron-isa, Johnson dang Britain-i kechi südir süaka Brexit deal nung sign ser aliba dak sendakba nung tanga kuli magütsüsüla ta ashiba kasa sangdong ajanga metetdaksü. Northern Ireland Protocol dak sendakba nung European Union (EU) aser Britain na tsüngda shishilembaba tsütsü mangatetep

adoker aliba mapang tang iba ken o ya renlokogo.

Cornwall nung G7 summit amenba mapang, France tir Emmanuel Macron-i anogo ka tejakdang Johnson dang, Brexit divorce deal nung sign asüba sülen ita trok lir clause ka danga tanaben benoka sensak mesemtettsü ta shiogo.

Kasa mapang nung Macron-i France aser UK na tsüngda tesendaktep yanglushitsü asoshi merangdangdar, ta AFP-i ashi. Brexit deal dak sendakba nung linük ana tsüngda ita aika atsütepba ajanga tesendaktep nung kongshiogo.

British foreign secretary

Dominic Raab-i European Union aija BBC radio dang, Northern Ireland ken o bentettsü atema asangsang nung inyakyim tapet tali benoktsü nungdaker ta shiogo.

UK Ato Kilonser Boris Johnson-i ayongzuka, G7 kübok aliba linük lenirtem tang England nung senden ka mender. Iba senden nung lenirtemi Covid-19 tensa aser rongsenketsüng dak sendakba nung kechi sentong yanglutsü aji ajaki repranga atadar. France tir, Macron-i France aser UK naprongla international aser transatlantic tesendaktep dak sendakba nung nükjidong ka dang lir ta shiogo.

Afghanistan nung ghonda 24 tsüngda telungpur 111 tepset



Kabul, Aami/June 12 (Agencies): Afghanistan kübok tesem balala nung taoba ghonda 24 tsüngda Taliban telungpur 111 tepsetogo, ta Ministry of Interior-i sangdong ka ajanga metetdaksüogo.

"Sorkar force temi anüng aser ali ajanga taoba ghonda 24 tsüngda Wardak, Kandahar, Uruzgan, Zabul, Badghis, Faryab, Nimruz, Helmand, Takhar aser Badakhshan province tem nung tesem balala amakba sülen Taliban nung

sepaitem 111 tepsetogo aser 79 yirutsüogo," ta Ministry sangdong ka ajanga Hokolbarnü metetdaksüba Xinhua news agency-i sangdonga liasü.

Sepaitemi linük kübok tesem balala nung bomb meima toktsür aliba nguteta azüokogo, ta kasa sangdong ajanga metetdaksü.

Ajisüaka Interior Ministry-i, iba rara nung security forces tem kar danga asü masü iba indang osang magütsü.

May 1 nü nungi US aser tanga NATO sepaitem Afghanistan nungi atsüngin tenzüka sülen Taliban telungpurtemi provincial capital, district, base aser checkpoint tem asendenshir tali tali makyonga arudar.

Hopta ishika tsüngda Afghanistan nung meyirejang aika pei talidak nungi jenshiogo. Bendanger sepaitem ya September 11 nü tashi nungbo ajak Afghanistan toktsür ainshia aotsü sentong lir.

Mulungnen O

"Ni rara tajungji raraogo, Ni alizüng tonga asemogo, Ni tamangji yuogo". 2 Timothy 4:7



ASO : 6th March 1949 || ASÜ : 8th June 2021

Temeim Ojala Aosangla (Kangtsung), shirangba anogo nungi la alima nungi pilaba mapang tashi ozü timtem nung nungita yariteper :

1. Kohima Ao Baptist Church
2. Kohima Lerie Colony Panchayat
3. Lerie Colony Covid Team.
4. Kohima Kangtsung Senso Telongjem.
5. Kohima Kangtsung Fellowship
6. Staff of Generation Division, Dept of Power.
7. Kinunger, Kiyonger aser Medemerterem.

Shirnokisa nübo, rongsen aser sarasadem agi yaritepogo nenok ajak dangi tsüngdong arua meshitet-aka iba osang kaket ajanga kangasa pelaba lemsateper. Nenok temeim mapa tajung onok molungzüng nung teti alitsü.

Tsüngremi nenok taküm aser kibongtem maneni moajang ta aji ozü sarasadem.

~ Temeim Kinungbo, Jabaso, Jala, Anük-oko aser Semchirtem.

Hong Kong activist Agnes Chow chiokogo



Hong Kong pro-democracy activist Agnes Chow

Hong Kong, Aami/June 12 (Agencies): Hong Kong pro-democracy activist Agnes Chow, ita tenet shi tepuokdak ayuba sülen Honibarnü chiokogo. 2019 küm yimti nung sorkar anema longkak aitba mapang temelaba makai lokti adenshiba nung shilem agiba atema la apu.

Arishi küm 24 tain activist ya külem activist Joshua Wong den, yimti kübok police headquarters anasa temelaba makai longkak aitba sentong nung shilem agiba atema apu, Wong tang tashi tepuokdak yua lir aser Chow jelia chiokba kuli tejangja memetet. La ita 10 tepuokdak ayutsü obendang agütsür liasü. Correctional Services Department-i, jurila ken o dak sendakba nung parnoki telangzüba magütsüsü, ta shiogo.

Chow ya Hong Kong indang New Territories district, Tuen Mun kübok aliba Tai Lam Correctional Institution nungi Honibarnü 10 ako shi nung chiok. Lai osangbenertem den sensak masem aser gari ka nung la medemer aser külem democracy activists tem den

oadok.

La pusemertemi "Agnes Chow add oil" ta Cantonese oshi nung ayimdena liasü, koba sorkar anema longkak aitba mapang kanga bulua ayimba yimiyim ka lir.

La pusemertem kari tola tanak aser mask tenenya semser liasü aser nisung katibo anüshi tenenya ka bener liasü, koba Hongkong nung longkak aitba temaitsü lir.

2014 küm universal suffrage khang longkak aitba mapang Chow den Wong aser Nathan Law nung kanga dang tongtibang lenirtem aküm.

Parnok asem senteper 2016 küm democracy group Demosisto ngutet, koba taoba küm yimti atema Beijing-i, national security law agizükba sülen ghonda ishika lir loksia liasü.

Iba ozüng ajanga pro-democracy inyakyimtem tashimeite kümdaksüogo aser 1997 küm Hong Kong yimti China nem bendanga agütsüba mapang "one country, two systems" inyakyim ka kübok yimti nem nüjiso agütsüsü nangzükba dak sendakba nung tebilemsü adokogo.

Kasa mapang nung, bendanger tashitem den lokteper alitsü ta temulung memeli bilema security law kübok Chow apu, ajisüaka iba ken o nung la maitsü.

Chow-i Japan oshi kanga junga jembiteter aser la sülen anidaker Japan nung talisa social media nung aika lir. La mapu tsüngda lai Japan aiben semdangogo. Lai twitter nung Japan oshi agi mapangshia zülutsür aser Japanese media-i la dang "goddess of democracy" ta ajar.

Chakhesang Scholars Forum-i asükhu lemsatep

Dimapur, Aami/June 12, 2021 (TYO): Chakhesang Scholars Forum-i sangdong ka ajanga, Scholars Forum (CSF), General Secretary Tavezo Theluo June 9 nü ajungbena anojungi asüba osang angazüka mang ayimba lemsatepogo. Pa District Hospital, Phek nung asü.

Tavezowas ya Chakhesang Scholars Forum nguteterem rongnung ka lir, koba tawa tentet aser pa lenisüba nung 2021 April 29 nü Pfüterero Government College, Pfüterero nung ketdangpurtem nem mapa belenzüksüba sentong agia liasü. Iba sentong nung pa Forum General Secretary asütsü shim.

Mapang balala nung sensak asema mapang pai Forum nükla indang lemsatep aser iba dak ajemdaker onoki Chakhesang nunger shisashirtem, intellectual aser tesayurtem tsüingda sensaksem tali ajungkettsü telemteba agi. Chakhesang Scholars Forum-i pa lenisüba nung May 22 nü "Roles of scholars towards the society" onük nung ajemdaker Webinar ka kanga takok ngua ayongzüka agiogo, ta Chakhesang Scholars Forum mendenbuba Dr. Zavise Rume-i ashi.

"Pa asüba ya takoksa tulu aser shisashir ka, bendanga agütsüba tesayur ka aser lanur lenir aser tarutsü lenir ka samaogo. Pa melener angutsü tasak asütsü aser pai inyakteta toktsüba mapang tajungtem teti menungra bilemtetsü," ta Rume-isa ashi.

Chakhesang Scholars Forum-i pa kinungtsü Neipre-u, tanurtem aser kinungertem den asükhu lemsatep. Tulusang Tsüingremi parnok nem asükhu koktettsü atema tashi aser anisüngzüik agüja ta sarasademtsür. Asür tanüla teti tatem makadak anisüngzükdakjang ta sarasademtsüba, kasa sangdong ajanga lemsatep.

National award takok angusang Buddhadeb süogo

New Delhi, Aami/June 12, 2021 (Agencies): Brehostibarnü, nüngtugu film director, Buddhadeb Dasgupta iba akümüli nungi pilaogo, ta asür kinungertemi sangdong ka ajanga metetdaksü.

Pa arishi küm 77 liasü, Dasgupta-i pa kinungtsü aser jala ana toktsür süogo. National award takok angusang, director Dasgupta ya mapang talangka tezüngjang tashidak agi shiranga aru aser hopta nung anaben tashi dialysis agia liasü, ta kinungertemi ashi.

Dasgupta asüba osang angashia, West Bengal, Chief Minister Mamata Banerjee-i mangyim jashi lemsatepogo.

"Ajaki jangjaa aliba film yanglur Buddhadeb Dasgupta asüba osang angashia temulung züreper. Pa maparen ajanga cinema wadang tsütsü temelenshi tulu adokdaksü. Film tentet atema pa asüba ya takoksa tuluka lir. Pai toktsür aoba adianu, kinunger aser medemer ajak den asükhu lemsatep," ta Twitter ajanga Banerjee-i lemsatep.

Film yanglur, Goutam Ghosh-i asükhu lemsatepba mapang, "Temang nung timtem liaka, Buddha da-i film tem yanglua, article zülua aser maparen balala inyaka liasü. Iba mapang, pai Tope aser Urojazah direct süogo. Pa asüba ya asenok ajak atema takoksa tulu lir," ta ashi.

HAPPY BIRTHDAY !

Küm 80 Ajungba Tepela Anogo

Wb.Chubanungba Pongen (Longjang)



13.06.1941

Tsüingrem taochi nung küm 80 tashi abensaa anir aruba asoshi Pa tenüng asanger.

Ano, onok akhümdong süa alitsü maneni nü nem Tsüingremi anema aliba arishi moajangma ta sarasademtsür.

- Temeim Chirnur, Semchirtem, Adianu aser Kinungertem.

MULUNGNEN O



Aso:
14.11.1934

Asü:
22.05.2021

"Ni rara tajungji raraogo, ni alizung tonga asemogo, ni tamangji yuogo" 2nd Timoti 4:7

Onoki teti meima aliba obala Asür Mr. Aomeren Aier (Nokinkaba) Waromung, Pa Tsüingrem metetba, taremsük, ajemalu, ochishir aser tetemjen tebu ka, onoki meyimlai aliba mapang ka, ajungbena pa iba Akümüli wadang tembanger, onok mulung zureb tia aser mangyim jashi nung alidang, arogopur, kiyongertem, kinungertem, sensosanger, anükapang, metemertem shirnokisa shisatsü, nubo, rongsen aser sarasadem agi nungita yariogo, nenok ajak den onoki pelaba lemsatep.

Tsüingremi nenok mapa tajung moajang ta onoki sarasademtsür.

-Temeim chirnurtem, anükapang, kinungertem aser semchirtem.

2021 AIM Awards nung Arlo-i nomination timba angu



Arlo Parks

London, Aami/June 12, 2021 (Agencies): Taruba 2021 AIM Awards sentong atema, Arlo Parks-i nomination timba ngua lir. Telemsa balala nung Arlo-i nomination pezü tashi nguogo.

Taküm indang Association of Independent Music Awards (IMA) nung arishi küm 20 tain kentener Arlo-i tanga artist aika madak nomination angur alitsü. Iba award sentong ya August 25, 2021 nü virtual ajanga Tiffany Calver aser Jamz Supernova nati achaayanga (co-host) agitsü.

Arlo ya la indang mezüing kensep - 'Collapsed in Sunbeams' atema Best Independent Album nomination ngua lir. Iba den külemi, la indang ken 'Hope' ajanga Best Independent Track, Best Independent Video aser UK Independent Breakthrough

nomination nguogo.

"AIM Awards pezü atema nomination anguba ya konang ama bilemer. Ni iba jenjang tongtettsü bilema meliasü aser tang ama mapang, kü mapa ajanga nisung aika mulung nung kongshiba angashidang jangratemer," ta Arlo-i ashi.

Kasa award sentong nung, Yorkshire nungi synthpop band - Working Men's Club-i Best Independent Album densema nomination asem nguogo.

Nomination anana angur rongnung AJ Tracey, Bicip, Che Lingo, ENNY, Floating Points, Fontaines D.C., Lava La Rue aser Tkay Maida dena lir.

Iba sentong ya terepranger medeni ayongzüksü. Tejangrartemi Air streaming platform, YouTube mesüra Facebook nung iba sentong reprangtettsü akok.

OFFICE OF THE AONOKPU SENSO MUNG DANG

H.Q. AONOKPU: NAGALAND

MANGYIM O

Aonokpu Senso Mung dang, Sanen Luden nungi takotet züngsem tajung ka, **Er.L. Imyulangba** ajongbena alima nungi piladokba atema senso züngsem ajonga aoksaba den jashia mang ayimba osang Senso mendenti ajanga metetdaksür.

Er. Alangba, lanuwa kaket riju nung aliba mapang kanga ajemalua, nükjidong takang yur takok tajung angutsü meranga azungba, tazüokba nung aliba aser temerüktet asangur taküm ka, Tsüingrem tsübuba shisatsü aser ajak den saku liteta, ajaki meimtsüsa lia aru. Aonokpu senso rongnungi mezüing pai Civil Engineering Degree (B.E.) angu. Nagaland Government küpok, Public Works Department nung Assistant Engineer nungi tenzüker Additional Chief Engineer tashi, amung tema wadang inyaker mapa nungi anisüngzüik angu. Pai pei tasoli aser pei nüburtem, temulungjang aser tanüla ajonga agi meim. Anungji nübu, sempet, mapang aser rongsen agi bendanga agüja yaria aser tenzüka aruogo. Mang dang tejangja akaba aser lenjang nung ochi asoshi tsüngchia litetba walunir tajung ka liasü. Kechi mapa südir süaka, peii ametba nung tatem tashi akang akanga, masetshii nokdaktetba den pai kechi amanger iba nungji ret reta aser ajang ajanga amangtetba lenir aser yimer senso asoshi jangjilong ka liasü. Sobaliba tarok angatetba shisatsü tulu den temeim aser aria bilemba taküm ka liasü. Pa aser par kibongi kija, yimten, arogo, aser lokdi balala atema mapa tajung aika nüburi teti bilemtetsüsa inyaka yutsür ogo.

Nüburtem atema khunendong, ano maneni pa nungi tuluka yimlaa aliba mapang, iba tapayutsü lenir anojungi telok lenisüba menden tazüing ka yutsür oadok nung takoksa tulu ajurua jashir aser kanga sasar. Pa tenzüka lenir tajung, nüburtem asoshi moajang ta sarasadem. Pai toktsür aoba tanurtem aser kinungertem ajak den Tsüingrem tesünep liang. Lenir tanüla teti tatem makai Kibuba den anisüngzükdak yujangma.

Sd/-
P.Nüngshikaba Longchar
Vice President

Sd/-
L. Rongsentemsü Jamir
Secretary.

KOMA SÜLA TELANGZÜBA

Q. Center government nungi Nagaland atema Covid-19 tongpang nung amshitsü yokba sen ajak yimsüsür aser tulurtemi chia-adok nunga koma süla ?

(Maneni tapak 6 nungi...)

Nüburtem taküm kümzüksü asoshi centre nungi yokba sen minister aser tulurtemi chiadokba ajanga jentibur senti taküm anojungi mekümzüktetti metetsümonga südaktsüogo. Ali rongsen aser sen nungbo kodanga tenük masüngtsü atakatem arutsübajia asen Naga nungeribo kodanga metsübuttsü. Anungji Ministera suang shiba tulura süang aibelener tejangja putetertemji kar kaseta indok nungbo yangji tan sür Naga lima ya terabosa melenshitsü ta nibo belemer nenokia koda?

- T. L Ao chumu.

Yimsüsüri chia dok nunga asenoki kecha mesütetsü / meshitetsü kechiyung asenoki parnok election nung tokteptang asenokia parnok sen chiatoker.

- ns Jr cmd

Chiadok nunga koma süla ta masü chiadokba agiang paper war adoker asateparji koda , dangar lima nungbo nübur meyong misuse asüba putetra nüburtemi spot nung sashisashia ola adoker aser Chief Minister asüyonga MLA asüyonga tulur tilar kecha tebandang makai tematiba jenjang nung ozüing tesashi agi merenshiadoker aji agi dangar lima ajunger aser tejakleni aor. Tulu ka auyara aour tilaka auyara aour kesa dang. Dang parnoki half ka chiadoker tesadangka expenditure sayubajia reprangangjo anogo shia amount balala dang andas agidang sayurdarji koda ajsüra nüburtemi ola madoktetterji koda? Ajungbena tsüzü rekoktsü amadang Naga nüburtem kumadokogo. Dang ya tan sür nüburtemi yamai dang melle opposition puri ola adokdangya nüburtemi semloka tera donga ia tutetta sayua merenshitsü mapang dongja dongokoniiiiii!

- T. L chumu

Sen yokba ajakji chinüa lir saka tesadang ka mesüra timba ka dak alaka ajakbo mehitetsüsa.

-A Moa Pongen Kma

Kanga junga bilemdangdi yimsüsür aser tulurtem ya nübur tenzükertem lir. Parnoki iba sen ya chiadokra atakatemji ngulanglang. Anungji tang Covid-19 wara dang nungi tesashiba timtem arura yimsüsür aser tulurtem denji asenok ajak samatsü

-SMS

Senji chiadokogo anungji kechi inyaksü ta ang jemi tajungba masü na saka state nung opposition tashi ita noktaksü ajungshir kechiaser ibaibo tashidak atemzüker yokba lir.

-SMS

Euro 2020: Italy-i goal 3-0 agi Turkey kokogo B Krejckikova-i French Open kokogo



European Championship asayamung tenzuka Italy aser Turkey mezüing asayaba nosa nung angur.

Rome, Aami/June 12, 2021

(Agencies): Hokolbarnü, Rome indang Stadio Olimpico nung European Championship asayamung tenzuka Italy aser Turkey mezüing asayaogo. Group A asaya nung Italy-i Turkey madak goal 3-0 agi takok angu. Italy atema Ciro Immobile aser Lorenzo Insigne nati goal ka ka idaktsü.

Iba asaya mezüing tashi nung, Roberto Mancini'er telok yagi Turkey indang defence kokteta asayatsü timtema liasü, saka tanabuba half tenzüker minute 53buba nung Merih Demiral-i mekümdangi par telok (Turkey) indang nung goal

inoktsü. Tang, Azzurri (Italy national team) pur asaya 28 tashi takok angur alitsü.

Goal kati tejakdang ser asayaba mapang, minute 66buba nung Leonardo Spinazzola-i metsüba ball ka keeper Ugurcan Cakir dak ondaker ao saka Immobile-i kara dang iba goal idaktsü.

Tatsüka dang lir minute 79buba nung Insigne-i goal tanabuba idakja goal 3-0 agi Italy pur Turkey tejakdang kümadok. Mezüing half tashi nung Turkey pur defence tsütsü kanga junga asaya, saka break sülen parnok defence tashimait akümba

asadangteta Italy puri gaol ana tashi idaktsütsü maongka agi.

European Championship asayamung nung Turkey pur mezüing asaya pungobenbuba tashi atonga tamakok angur alitsü.


Kasa mapang, Italy indang tasembuba goal ajanga otsü tasen ka yangluogo. Tan Euro asayamung nung Italy puri asaya ka nung goal 3 tashi idaktsüba ya mezüing lir

"Rome nung mezüing match junga asaya tenzüksü asoshi onoki terenemba liasü aser aji kanga tongtibang. Iba takok ya onok atema dang masü saka Italy nungur ajak atema tepelatsü osang," ta Mancini-i ashi.

"Tanü asaya ama, taruba asayatem nunga takok angutsü imlar, saka Wembley nung masayadang asaya trok nung tokteptsü anünga lir," ta pai ashi.

Iba asayamung lapoka opera singer Andrea Bocelli-i ken ka tena telok saksalemdaktsüba sülen, terepranger 16,000 dena iba asaya tenzuka liasü.

June 16, 2021 nü, Rome kübok Group A indang tanabuba round nung Italy-i Switzerland den asayatsü aser Baku nung Turkey-i Wales den asayatsü terenemba lir.



Paris, Aami/June 12, 2021: Czech tsür Barbora Krejckikova-i French Open 2021' tetsür kija final koker sülen lai takok marok amer tangokba noksa ka yangi angur.

Paris, Aami/June 12, 2021

(Agencies): Honibarnü, French Open 2021 asayamung tetsür kija final asaya nung Czech tsür Barbora Krejckikova-i Russia tsür Anastasia Pavlyuchenkova madak takok nguogo.

Court Philippe-Chatrier nung final asayaba mapang, Barbora-i 6-1, 2-6, 6-4 agi world no. 31 Anastasia tsükdaktsü.

1981 küm kasa asayamung tetsür kija final nung Hana Mandlikova-i Roland-Garros

single title takok ngur külen nungi French Open takok angur Czech tsür rongnung Barbora mezüing kümogo.

Barbora-i ghonda ka ser minute pungo nung Anastasia tsükdaktsü aser lai mezüing tongtibang asayamung ka nung takok angur alitsü.

World no.33, Barbora-i ano Deobarnü külem Czech tsür Katerina Siniakova den longjemer tetsür tarep final asayatsü terenemba lir. Krejckikova aser Siniakova nati taoba asayamung nung Grand Slam doubles title anaben tashi takok ngua lir.

Roland-Garros tenzüksü anogo ishika lia, Strasbourg asayamung nunga Barbora Krejckikova-i takok nguogo aser taküm lai asaya 12 tashi atonga takok angur alitsü.

Tesüiba ita 8 tejakdang, Paris kübok Grand Slam fourth round nung Barbora mezüing asaya mapang, singles' nung la ranking 114 nung liasü aser tang Roland-Garros nung lai takok nguogo.

Paris asayamung nung küm trok tashi atonga mezüing shilem agirtemi Grand Slam women's singles title ajangzükteta arudar.

"Tanü atalokba ya ni mamangteter. Atangji nunga, Grand Slam ka takok anguba ya mamangteter," ta asaya temer sülen Krejckikova-i ashi.

Yuzvendra-i Viswanathan den Chess asayatsü

Chennai, Aami/June 12, 2021

(Agencies): India national cricket team nungi asayar Yuzvendra Chahal-i iba saisapong dak alaka, Chess asayatsü jangra aliba ajaki meteta lir. Indian grandmaster - Viswanathan Anand-i June 13, 2021 nü nungtugu nisung kar den exhibition match asayatsü aser Chahal-i iba exhibition nung shilem agitsü maongka nguogo.

India nung COVID-19 relief maparen dak sendakba nung senotsü bendentsü nükjidong nung iba exhibition match asayatsü. Linük tesem balala nung jana bendenertem, shirnok Covid-19 tenokdangba ajanga timtemdar, parnok atema iba exhibition match ajanga sen lakh 8.8 tashi bendentsütsü asoshi iba online charity event ayongzüker.

Taoba mapang world chess champion Anand-i iba exhibition nung Chahal, Ritish Deshmukh, Aamir Khan, Arijit Singh, Ananya Birla aser Manu Kumar Jain nungur den asayatsü terenemba lir.

Honibarnü chess.com nung ayongba "Chess For Charity" nung India No.1 Anand, No.2 Vidit Gujrathi, Grandmaster Nihal Sarin, Woman Grandmaster Tania Sachdev aser Croatia nungur Antonio Radic nungeri comedian team - Biswa Kalyan Rath, Samay Raina, Abhishek Upamanyu aser Aakash Mehta nungur den asayaogo.

Taoba mapang national under-12 champion, Chahal-isa April 5 nü online blitz event ka



Viswanathan Anand & Yuzvendra Chahal

nung shilem agiogo.

April 11 nü, Anand-i online event nung atonga chess asayaogo aser iba mapang PM-CARES Fund atema sen lakh 4.5 shi bemdentet.

Chahal-i Instagram sabang ajanga fans dang iba osang sangoktsü. India cricket team nung spinner Chahal kinungtsü Dhanashree Verma-i mezüing fans dang iba chess exhibition match indang osang metetdaktsü aser la kinungbo nem tenüngsang agütsü. Kasa post' ya Chahal-ia Instagram sabang nung lemsatapa liasü.

Kasa mapang, Anand-ia Twitter nung video ajanga fans den jemi aser parnok dang iba osang sangoktsü. Video ajanga sensaksemba dak alaka, Anand-i, "Item asayatem den chess asaya nung tokteptsü asoshi yongya atar," ta lemsatap.

Chahal lanuwa mapang chess asayaba ajaki jangjaa lir aser national asayamung nunga

pai shilem agiogo. National level dak alaka, World Youth Chess Championship asayamung nung India tenüng nungi Chahal asayaogo.

December 2020 nung Chahal-i Dhanashree den kibong aküm. Apuani yagi mapang shia pei pei Instagram sabang ajanga fans dang tena taküm indang otsü lemsatapa arudar.

Indian Premier League (IPL) 2021 asayamung nung Chahal-i tesüsa shilem agiba nguogo. Franchise kar nung Covid-19 putetba ajanga May tetenzüklen iba asayamung thitemja liasü.

Tang thitsür aliba IPL 2021 asayamung ya September aser October tsüngda United Arab Emirates (UAE) nung tenzüksütsü terenemba lir.

Taoba küm, India nung coronavirus wara süshia maoba ajanga, IPL 2020' ya UAE nung asaya liasü aser iba asayamung takok ngua asayaogo.

Bayern Munich indang "World Squad" nung Shubho Paul shimogo

Kolkata, Aami/June 12, 2021

(Agencies): Germany nungi nungtugu club Bayern Munich-i parnok indang world under-19 squad atema arishi küm 17 tain India nungur striker, Shubho Paul shimogo.

Asayar tasen - Paul, shiba West Bengal kübok Howrah district nungi lir, pai Bayern indang training programme' nung shilem agitsü. Bayern Club indang 'World Squad' tentettsü nükjidong nung, alima tesem balala nungi Football asayar 15 shimtsü asoshi iba club indang 'talent hunt programme' ka ajanga Paul shima liasü.

Iba talent hunt maparen ya Bayern nungi asayar mongin aser World Cup takok angusang Klaus Augenthaler aser club nungi international programmes indang coach Christopher Loch nati anir achaayanga liasü.

Bayern indang website ajanga angazükba agi, iba talent hunt programme nung shilem agitsü asoshi, asayatem 2003 aser 2004 küm tsüngda asortem asütsüla. Iba den külemi, hunt nung shilem agitsüpur ajak dang parnok asayaba video tatsüka yoktsü asoshi asüngdang.

Selection nung dener asünung, Paul Germany-i aotsü aser July ita hopta ana atema training agitsü. Kasa mapang, Bayern indang 'World Squad' yagi Bundesliga indang team

tasen den asayatsü sentong lir.

Paul, shiba India indang Under-17 team nung züngsem ka lir, 2017 küm youth trials' mapang Sudeva FC indang talent scouting team-i pa shima liasü aser I-League telok tawabangba kübok pa nem training agütsü. Sudeva Under-13 team nung Paul-i football asaya tenzük aser pa tang, Sudeva senior I-League team indang captain lir.

Football wadang nung ajemoka, Paul-i mezüing season nung asayaba mapang, match 14 nung pai goal 58 tashi idaktsü. Iba den külemi, U-13 I-League nung goal timtiba idaktsür rongnung Paul aküm.

U-13 team nung takok ngua asayaba sülen, Indian football team-i Paul shima liasü aser India U-15 national camp nung adentsü asoshi pa jaok. Uzbekistan nung ayongba 2019-20 AFC U-16 Championship qualifiers nunga India team nungi Paul asaya liasü aser iba asayamung nung pai goal 3 idaktsü. AIFF U-18 Youth League nunga pai asayaogo aser iba asayamung nung Paul-i goal 14 tashi idaktsü.

Bayern Munich indang "World Squad" nung Shubho Paul shimba osang angashia, West Bengal chief minister Mamata Banerjee-i pa nem tenüngsang agütsüogo.

BILEMDANGANG

"Ulura bilema tenzükeri tila ka danga mepushir."